

ЕРЕВАНСКИЙ ГОСУДАРСТВЕННЫЙ
УНИВЕРСИТЕТ

ФАКУЛЬТЕТ АРМЯНСКОЙ
ФИЛОЛОГИИ



YEREVAN STATE
UNIVERSITY

FACULTY OF ARMENIAN
PHILOLOGY

ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆ
ՀԱՅ ԲԱՆԱՍԻՐՈՒԹՅԱՆ ՖԱԿՈՒԼՏԵՏ

ՀՀ, Երևան, 0025, Աբովյան 52^ա Республика Армения, Ереван, 0025, Абовяна 52^а 52^а Abovyan, 0025, Yerevan, Republic of Armenia (+374 10) 54-43-91/94,95,96/1-37, armphilology@ysu.am, www.ysu.am

ԱՐՁԱՆԱԳՐՈՒԹՅՈՒՆ ԹԻՎ 5

ԵՊՀ ՀԱՅ ԲԱՆԱՍԻՐՈՒԹՅԱՆ ՖԱԿՈՒԼՏԵՏԻ ԳԻՏԽՈՐՀՐԴԻ՝ 2026 Թ. ՓԵՏՏՐՎԱՐԻ 18-ԻՆ
ԿԱՅԱՑԱԾ ՆԻՍՏԻ

Օրակարգում՝

1. Ակ. Հ. Թամրազյանի անվան հայ գրականության պատմության և գրականության տեսության ամբիոնի վարիչի ընտրություն:

Օրակարգի 1-ի հարցի Ֆակուլտետի դեկան, դոց. Ա. Գալստյանը նախ ներկայացրեց ամբիոնի վարիչի ընտրության ընթացակարգը, այնուհետև տեղեկացրեց, որ Ակ. Հ. Թամրազյանի անվան հայ գրականության պատմության և գրականության տեսության ամբիոնի վարիչի թափուր պաշտոնի համար դիմել է 1 թեկնածու՝ Բ. Գ. Թ., դոցենտ Նվարդ Խաչատուրի Վարդանյանը: Ֆակուլտետը ստացել է թեկնածուի գործը, փաստաթղթերը ամբողջական են, նախապես տեղի է ունեցել նաև ամբիոնի նիստ, որտեղ կայացել է քվեարկություն: Ամբիոնի նիստի քվեարկության արդյունքները, ինչպես նաև թեկնածուի գործերը ներկայացնելու համար խոսքը տրվեց ֆակուլտետի մրցութային հանձնաժողովի նախագահ պրոֆ. Ա. Աբաջյանին: Պրոֆ. Ա. Աբաջյանը ընթերցեց մրցութային հանձնաժողովի նիստի արձանագրությունը, որում մասնավորապես նշված էր.

ԼՍԵՑԻՆ - Ակադեմիկոս Հ. Թամրազյանի անվան հայ գրականության պատմության և գրականության տեսության ամբիոնի վարիչի թափուր պաշտոնի համար դիմած թեկնածուի հարցը: Նիստը վարում էր հայ բանասիրության ֆակուլտետի մրցութային հանձնաժողովի նախագահ, Բ. Գ. Դ., պրոֆ. Ա. Աբաջյանը:

ԱՐՏԱՀԱՅՏՎԵՑԻՆ- Բ. Գ. Դ., պրոֆ. պրոֆ. Ա. Աբաջյանը, Ս. Մուրադյանը, Ա. Մակարյանը, Բ. Գ. Թ., դոց. դոց. Ա. Գալստյանը, Ա. Զրբաջյանը:

Նշվեց, որ ամբիոնի վարիչի թափուր պաշտոնի համար հայտարարված մրցութային մասնակցելու համար դիմել է միայն մեկ թեկնածու՝ ամբիոնի դոցենտ, Բ. Գ. Թ. Նվարդ Խաչատուրի Վարդանյանը: Ս.թ. փետրվարի 9-ին կայացած նիստում, որը վարել է հայ գրականության պատմության և գրականության տեսության ամբիոնի վարիչ, Բ. Գ. Դ., պրոֆ. Ա. Մակարյանը, ամբիոնի 11 անդամներից մասնակցել է 10-ը: Ամբիոնը բաց քվեարկությամբ ընտրել է դոցենտ Նվարդ Վարդանյանին՝ 10 կողմ, 0 դեմ ձայների հարաբերակցությամբ և երաշխավորել նրան մասնակցելու Ակադեմիկոս Հ. Թամրազյանի անվան հայ գրականության պատմության և

գրականության տեսության ամբիոնի վարիչի թափուր պաշտոնի համար հայտարարված մրցույթին:

Նշվեց, որ Ն. Վարդանյանը 2006 թվականից աշխատում է ԵՊՀ հայ բանասիրության ֆակուլտետի հայ գրականության պատմության և գրականության տեսության ամբիոնում, գիտակ, համեստ, սիրված դասախոս է: Հեքիաթագիտական մի քանի միջազգային գիտաժողովների համակազմակերպիչ է, արտերկրում մասնակցել է տարբեր միջազգային գիտաժողովների՝ օտար լեզվով ներկայացնելով գիտական զեկուցումներ: Նրա ղեկավարությամբ 2024-2025թթ. հաջողությամբ իրականացվել է «Արցախյան ավանդազրույցների գրառում, քարտեզագրում և շտեմարանավորում» դրամաշնորհային ծրագիրը, այժմ ընթացքի մեջ է «Ժողովրդական խաղատեսակները և դրանց բանահյուսական բաղադրիչները Լեռնային Ղարաբաղի ավանդական մշակույթում» խորագրով՝ ԲԿԳԿ դրամաշնորհային ծրագիրը (2025-2028):

Նա համահեղինակ է 2 կոլեկտիվ մենագրության, 20 գիտական հոդվածների, որոնցից չորսը լույս են տեսել բարձր վարկանիշ ունեցող պարբերականներում:

2025 թ. Ն. Վարդանյանը մասնակցել է դոցենտի կոչման համար նոր ընթացակարգով հայտարարված մրցույթին և ֆակուլտետի գիտխորհրդում անցկացված փակ քվեարկության արդյունքներով 5 տարով ընտրվել այդ պաշտոնում:

ԵԶՐԱԿԱՅՈՒԹՅՈՒՆ - Հիմք ընդունելով վերոգրյալները՝ մրցութային հանձնաժողովը որոշեց դոցենտ Նվարդ Խաչատուրի Վարդանյանին երաշխավորել մասնակցելու ակադեմիկոս Հ. Թամրազյանի անվան հայ գրականության պատմության և գրականության տեսության ամբիոնի վարիչի թափուր պաշտոնի համար հայտարարված մրցույթին:

Այնուհետև ծրագրային ելույթի համար խոսքը տրվեց թեկնածուին:

Բ. գ. թ., դոցենտ Նվարդ Վարդանյանը իր ելույթում մասնավորապես նշեց.

Ակադեմիկոս Հրանտ Թամրազյանի անվան հայ գրականության պատմության և գրականության տեսության ամբիոնը ոչ միայն հայ բանասիրության ֆակուլտետի, այլև Երևանի պետական համալսարանի հնագույն ամբիոններից է և գործում է 1929թ.-ից: Ամբիոնը հիմնադրման օրվանից ղեկավարել են այնպիսի ճանաչված և հայտնի հայագետներ, ինչպիսիք են Արսեն Տերտերյանը, Մկրտիչ Մկրյանը, Հրանտ Թամրազյանը, Մամվել Մուրադյանը, Ալբերտ Մակարյանը: 2022թ.-ից ամբիոնն ընդլայնել է գործունեությունը՝ իր կազմում ընդգրկելով նաև գրականության տեսության և քննադատության ամբիոնը, որը ևս իր հերթին հիմնադրել և ղեկավարել են իրենց գործին նվիրյալ գիտնականներ Էդվարդ Ջրբաշյանը, Հենրիկ Էդոյանը, Ժենյա Քալանթարյանը, Աշխեն Ջրբաշյանը:

Ամբիոնն ունի արդեն իսկ ձևավորված հարուստ ավանդույթ և անցած երկար ուղի: Տարիներ ի վեր եղել է հայագիտության խոշոր կենտրոն, ուր դասավանդել են ականավոր հայագետներ, ստեղծվել են կարևոր գիտական աշխատանքներ: Շատ կարևոր է պահպանել այդ ավանդույթները, դրանց հիմքի վրա ձևավորել նորերը, նպաստել նորարարությանը՝ միևնույն ժամանակ ցանկացած նորարարություն բխեցնելով հայագիտության շահերից և ազգային արժեհամակարգից:

Ամբիոնի հետագա գործունեության կազմակերպման հարցում կարևորում եմ հետևյալ աշխատանքների հետևողական իրագործումը:

1. Նպաստել ամբիոնի գործունեության ոլորտների՝ *հայ ժողովրդական բանահյուսություն, հայ հին և միջնադարյան գրականություն, հայ նոր գրականություն, գրականության տեսություն, հայ գրականագիտության պատմություն*, զարգացմանը թե՛ կրթական ծրագրերի բարելավման, թե՛ գիտական ուղղություններին համապատասխան գործունեության ծավալման առումով:
2. Դասական առարկաների դասավանդումը պահպանելով որպես հիմնայունային՝ միևնույն ժամանակ փորձել մասնագիտությունը գրավիչ դարձնել՝ կիրառություն ենթադրող, գրականությունը միջմշակութային կապերի մեջ դիտարկող առարկաներ և կրթական ծրագրեր ներմուծելով:
3. Նպաստել երիտասարդ կադրերի պատրաստմանը, առողջ և բնականոն սերնդափոխության ապահովմանը:
4. Նպաստել գիտահետազոտական աշխատանքների զարգացմանը՝ ձևավորելով թիմային աշխատանքային խմբեր՝ ինչպես ներամբիոնային, այնպե՛լ էլ այլ մասնագիտական ոլորտների հետ միջգիտակարգային կապեր ստեղծելով (գրականություն և լեզու, մշակույթ, հոգեբանություն և այլն): Սրանով մենք ոչ միայն կարձագանքենք ժամանակի պահանջներին, այլև դուրս կբերենք մեր մասնագիտությունը նեղ շրջանակներից՝ հարուստ դաշտի մեջ դնելով:
5. Նպաստել ամբիոնի աշխատակիցների ՄԳՇ հրատարակություններին, որին կարող է նպաստել նաև ավագ և կրտսեր սերունդների համագործակցային միջավայրի ձևավորումը, համագործակցություն, որից կարող են շահել երկու կողմերը ևս: Ավագները կլինեն փորձի փոխանցող, կրտսերները՝ ժամանակակից հմտություններին տիրապետող:
6. Փորձել ամբիոնում իրականացնել գիտական ծրագրեր, համագործակցել դրամաշնորհներ տրամադրող կառույցների հետ՝ դիմելով և հայտեր ներկայացնելով:
7. Կազմակերպել գիտական սեմինարներ ամիսը մեկ անգամ, փորձել հնարավորինս լայն լսարան ընդգրկել՝ ամբիոնը դարձնելով գիտական կենտրոն:
8. Նպաստել միջազգային համագործակցությանը, կապեր հաստատել տարբեր երկրների համալսարանների հայագիտական կենտրոններին, ոլորտի հայ և օտարազգի հեղինակավոր մասնագետների հետ, ինչը կնպաստի նաև համատեղ ծրագրերի և գիտաժողովների իրականացմանը:
9. Կազմակերպել ամբիոնի ուղղություններին համապատասխանող ոլորտներին վերաբերող տեղական և միջազգային գիտաժողովներ, նպաստել գիտաժողովի նյութերի հրատարակությանը:
10. Շարունակել «Բանահավաքչական ակումբի» գործունեությունը, որը ֆակուլտետում հիմնադրվել է 2021թ-ից, սակայն ավելի ակտիվ գործունեություն ծավալել է 2024-25թթ. ԵՊՀ ներքին դրամաշնորհի շրջանակներում:

Այս բոլոր աշխատանքների գլխավոր նախապայմանը ջերմ մարդկային փոխհարաբերություններն են, որոնք ձևավորված են ամբիոնում, և որոնց հետագա ավելի ջերմացմանը սիրով պիտի նպաստեն: Ցանկացած դժվարություն հաղթահարելի է միասնության և փոխըմբռնման պայմաններում:

Այնուհետև, ըստ ընթացակարգի, սկսվեցին ելույթները:

Բ. գ. դ., պրոֆեսոր Ա. Մակարյանը իր խոսքում նշեց, որ դոցենտ Ն. Վարդանյանը ունի գիտական, մանկավարժական, մարդկային օրինակելի հատկանիշներ, որոնց շնորհիվ վայելում է գործընկերների և ուսանողների համակրանքը:

Բ. գ. դ., պրոֆեսոր Ա. Աբաջյանը ևս նշեց, որ արդեն տարիներ ամբիոնի դոցենտի պաշտոնում աշխատող Ն. Վարդանյանը իրեն դրսևորել է որպես դասախոսական գործի լավագույն կազմակերպիչ՝ ծավալելով նաև բեղուն գիտական գործունեություն:

Բ. գ. դ., պրոֆեսոր Ժ. Քալանթարյանն էլ նշեց, որ բացի լավ գիտնական ու դասախոս լինելուց, Ն. Վարդանյանը նաև հանրապետությունում ընդունված և հայտնի բանահյուսագետ է:

Բ. գ. թ., դոցենտ Վ. Պետրոսյանը ևս իր խոսքում բարձր գնահատեց Ն. Վարդանյանի գիտական, կազմակերպչական և մանկավարժական հատկանիշները՝ կոչ անելով քվեարկել թեկնածուի օգտին:

Ելույթներից հետո, համաձայն ընթացակարգի, փակ-գաղտնի քվեարկություն անցկացնելու համար ընտրվեց ձայներ հաշվող հանձնաժողով՝ հետևյալ կազմով՝

- 1. Արամ Խաչատրյան – նախագահ
- 2. Մանուկ Ֆալակյան
- 3. Ալվարդ Կոչկակարյան

Փակ-գաղտնի քվեարկությունից հետո նախագահ, բ. գ. թ. Արամ Խաչատրյանը հրապարակեց արդյունքները.

Խորհրդի 32 անդամներից նիստին ներկա են եղել և քվեարկությանը մասնակցել են 29-ը:

Բաժանվել է 29 քվեաթերթիկ:

Քվեատուփում եղել է 29 քվեաթերթիկ:

Քվեարկությանն արդյունքներն են՝

Հ/Հ	Թեկնածուի ազգանուն, անուն, հայրանուն	ԿՈՂՄ	ԴԵՄ	ԱՆՎԱՎԵՐ
1.	Վարդանյան Նվարդ Խաչատուրի	27	0	2

Անվավեր քվեաթերթիկների քանակը՝ 2:

Ո Ր Ո Շ Ե Ց Ի Ն - 1. Հաշվի առնելով փակ-գաղտնի քվեարկության արդյունքները՝ բ. գ. թ., դոցենտ Նվարդ Խաչատուրի Վարդանյանին ընտրված համարել ակադեմիկոս Հ. Թամրազյանի անվան հայ գրականության պատմության և գրականության տեսության ամբիոնի վարիչի պաշտոնում:

2. Միջնորդել համալսարանի գիտական խորհրդին՝ հաստատելու ֆակուլտետի գիտխորհրդի քվեարկության արդյունքները, և խնդրել ռեկտորին, գործող կարգի համաձայն, ընտրված թեկնածուի հետ կնքել աշխատանքային պայմանագիր:

ՀԱՅ ԲԱՆԱՍԻՐՈՒԹՅԱՆ ՖԱԿՈՒԼՏԵՏԻ

ԳԻՏԱԿԱՆ ԽՈՐՀՐԴԻ ՆԱԽԱԳԱՀ՝

Ա. ԳԱԼՍՅԱՆ

ԳԻՏՔԱՐՏՈՒՂԱՐ՝

Լ. ՄԵԼՔՈՆՅԱՆ